



Senin, 05 Oktober 2020

Ogen: Jeremia 33:14-26



Reh Me Raja Si Bujur



Raja eme sekalak pemimpin, pemimpin sada kerajan. Tugas sekalak raja eme mabai dengen mastiken kegeluhen rayatna mehuli ras mejuah-juah. Kegeluhen kalak si nterem tergantung ku bas kebijaken ras kengasupenna merentah alu bujur ras benar. Dikune la payo pastilah kegeluhen rayatna la tenang ras dame. Bageme kecibal kegeluhen bangsa Dibata i bas jaman Jeremia, pemimpin ras tokoh agama lanai jadi pemimpin si mereken kesejahteraan man rayat si nterem. I bas kecibal si bage me Jeremia nehken persinget Dibata termasuk nuriken kerna kerehen raja si bujur si jadi pengapul man bangsa enda. I ja kenca padan si jadi pengarapen bagepe Dibata masu-masu doni ras kuta kuta ingan tading bangsa enda maka kerinana nggeluh alu mehuli. Emaka iumputina padan pengarapen kerna pemimpin si banci nehi kerina si mehuli si enggo ipadanken Dibata. Raja si bujur e reh arah kesusuren Daud nari. Enda me perpadanen si enggo ibahan Dibata ras Daud si isehkenNa paksa e arah nabi Jeremia. Dibata me si milih kesusuren Abraham, Isak ras Jakub guna ngerajai bangsaNa alu bage maka inanami bangsa e kesenangan mulihi. Pemimpin si bujur la banci lang mabai kalak si pimpinna ngenanami kesenangan. Senang nggeluh sabap kerina si mehuli banci inanamina. Bagenda me bangsa-bangsa i bas jaman enda, bangsa si ipimpin kalak si bujur ngenca ngasup ngenanami kesenangan subuk i bas jabu, masyarakat sabap la lit tekanen kai pe si erbahan la iakapna senang. Konteks erbangsa genduari, ija pemimpin e bekasta milih, ula kal sempat erkadiola kita milih pemimpinta. Bagi rusur ilumbaken man banta, mari pilihlah pemimpin si bujur, tutus, ngukuri kiniulin rayatna janah erjuang ia nehi erbage hal si mehuli si nanami kalak si ipimpinna, si labo mpesenangken dirina saja.